

«21» հունիսի 2021թ.

ք. Երևան

ՀՀ պետական եկամուտների կոմիտեի իրավաբանական վարչության պետ Ա. Մնացականյանս, քննելով վարորդ Կարեն Յուրիի Գալստյանի վերաբերյալ նյութերը.

Պ Ա Ր Զ Ե Ց Ի

2021 թվականի մայիսի 13-ին ՀՀ ՊԵԿ Արարատյան մաքսատուն-վարչության աշխատակիցները «Ապավեն տերմինալ» ՓԲ ընկերության մաքսային հսկողության տարածքում զննման են ենթարկել Կարեն Գալստյանի կողմից վարվող «DAF» մակնիշի, «15CF005» պետհամարանիշի ավտոմեքենան:

Զննման արդյունքում պարզվել է, որ «Արվա գրուպ» ՍՊ ընկերության անվամբ Ռուսաստանի Դաշնությունից Հայաստանի Հանրապետություն ներմուծված և Բագրատաշենի մաքսային կետ-բաժնում 06.05.2021 թվականին լրացված թիվ 05100033/060521/0013574 տարանցման հայտարարագրով հայտարարագրված ապրանքներում առկա է ապրանքի քաշի անհամապատասխանություն, ինչպես նաև չհայտարարագրված բեռ: Մասնավորապես, բեռն ուղեկցող փաստաթղթերում՝ Р-2021/04/87 առ 30.04.2021թ. հաշիվ-ապրանքագրի 4-րդ դիրքում առկա որսորդական երկարաճիտ կոշիկների քաշը փաստացի կազմել է 2063կգ, հայտարարագրված առկա 1080 կգ-ի փոխարեն, ինչպես նաև առկա է չհայտարարագրված 983 կգ քաշով հագուստ:

Համաձայն 13.05.2021 թվականի թիվ 256 մաքսային զննման ակտի՝ մաքսային մարմինների կողմից դրված մաքսային ապահովման միջոցը վնասված չի եղել:

Փաստի առթիվ վարորդ Կարեն Յուրիի Գալստյանի նկատմամբ ՀՀ մաքսային օրենսգրքի 203-րդ հոդվածի հատկանիշներով կազմվել է մաքսային կանոնների խախտման վերաբերյալ արձանագրություն:

Վարչական վարույթի շրջանակներում Կարեն Յուրիի Գալստյանը 21.05.2021թ. և 27.05.2021թ. ծանուցագրերով հրավիրվել է ՀՀ ՊԵԿ իրավաբանական վարչություն վարչական վարույթի մասնակցության, սակայն վերջինս չի ներկայացել և բացատրություն չի ներկայացրել:

«Արվա գրուպ» ՍՊ ընկերության տնօրենը հայտնել է, որ 10803040/020521/0035031 տարանցման հայտարարագրով Ռուսաստանի Դաշնությունից Հայաստանի Հանրապետություն ներմուծված և Կարեն Գալստյանի կողմից շահագործվող մեքենայում հայտնաբերված 983 կգ չհայտարարագրված հագուստը և որսորդական երկարաճիտ կոշիկները, որոնց վերաբերյալ առկա է անհամապատասխանություն, «Արվա գրուպ» ՍՊ ընկերության անվամբ է ներմուծվել և պատկանում է «Արվա գրուպ» ՍՊ ընկերությանը:

ԵԱՏՄ մաքսային օրենսգրքի (այսուհետ՝ Օրենսգիրք) 2-րդ հոդվածի 26-րդ կետի համաձայն՝ «փոխադրողն» այն անձն է, որն իրականացնում է ապրանքների և (կամ) ուղևորների փոխադրում (տրանսպորտային փոխադրում) Միության մաքսային սահմանով և (կամ) մաքսային հսկողության տակ գտնվող ապրանքների փոխադրում (տրանսպորտային փոխադրում) Միության մաքսային տարածքով:

Օրենսգրքի 142-րդ հոդվածի համաձայն՝ «Մաքսային տարանցում» մաքսային ընթացակարգը կիրառվում է Միության մաքսային տարածքով, ինչպես նաև Միության անդամներ չհանդիսացող պետությունների տարածքներով օտարերկրյա և Միության ապրանքների փոխադրման համար:

Օրենսգրքի 107-րդ հոդվածի 1-ին մասի համաձայն՝ տարանցման հայտարարագրում նշվում են հետևյալ տեղեկությունները՝ հայտարարատուի, փոխադրողի մասին, ապրանքներն ուղարկող երկրի և նշանակման երկրի մասին, այն տրանսպորտային միջոցի մասին, որով տեղափոխվում են ապրանքները, ապրանքների անվանման, քանակի և արժեքի մասին՝ տրանսպորտային (փոխադրման) փաստաթղթերին համապատասխան ապրանքների ծածկագրի մասին,

ապրանքների համաքաշի կամ ծավալի մասին, ինչպես նաև ապրանքների քանակը՝ արտահայտված չափման լրացուցիչ միավորներով և այլ տեղեկություններ, իսկ 111-րդ հոդվածի 8-րդ կետի համաձայն՝ գրանցման պահից մաքսային հայտարարագիրը դառնում է իրավական նշանակություն ունեցող փաստերի մասին վկայող փաստաթուղթ:

Օրենսգրքի 302-րդ հոդվածի 3-րդ մասի համաձայն՝ Միության ապրանքները Միության անդամներ չհանդիսացող պետությունների տարածքներով Միության մաքսային տարածքի մի մասից Միության մաքսային տարածքի մեկ այլ մաս փոխադրման համար ենթակա են «մաքսային տարանցում» մաքսային ընթացակարգով ձեակերպման:

Օրենսգրքի 83-րդ հոդվածի համաձայն՝ «մաքսային տարանցում» մաքսային ընթացակարգի հայտագրման դեպքում որպես հայտարարատու կարող են հանդես գալ փոխադրողը, այդ թվում նաև՝ մաքսային փոխադրողը, առաքողը, եթե նա Մաքսային միության անդամ պետության անձ է: Օրենսգրքի 84-րդ հոդվածի 2-րդ կետով սահմանված են հայտարարատուի պարտականությունները, այն է՝ հայտարարատուն պարտավոր է՝ կատարել ապրանքների մաքսային հայտարարագրում, մաքսային մարմին ներկայացնել մաքսային հայտարարագրում ներկայացված տեղեկությունները հաստատող փաստաթղթեր, իսկ 3-րդ կետի համաձայն՝ հայտարարատուն, Մաքսային միության անդամ պետությունների օրենսդրությանը համապատասխան, պատասխանատվություն է կրում:

Օրենսգրքի 308-րդ հոդվածի 1-ին կետի համաձայն՝ Միության անդամներ չհանդիսացող պետությունների տարածքներով Միության մաքսային տարածքի մի մասից Միության մաքսային տարածքի մեկ այլ մաս Միության ապրանքների փոխադրման դեպքում փոխադրողը, անկախ «մաքսային տարանցում» մաքսային ընթացակարգով ձևակերպված ապրանքների հայտարարատուն լինելու հանգամանքից, պարտավոր է. ապահովել ուղարկող մաքսային մարմնի կողմից սահմանված ժամկետում ապրանքներն ու դրանց փաստաթղթերը հասցնել ապրանքների առաքման վայրը, ապահովել ապրանքների, մաքսային կապարակների և կնիքների, կամ նույնականացման այլ միջոցների պահպանվածությունը: Թույլ չտալ ապրանքների բեռնաթափումը, փոխաբեռնումը (վերաբեռնումը) և դրանց հետ կատարվող բեռնային այլ գործողությունների իրականացումը, ինչպես նաև այդ ապրանքները փոխադրող տրանսպորտային միջոցների փոխարինումը Միության անդամներ չհանդիսացող պետությունների տարածքներում՝ առանց ուղարկող մաքսային մարմնի թույլտվության:

ՀՀ մաքսային օրենսգրքի 189-րդ հոդվածի համաձայն՝ մաքսային կանոնների խախտում է համարվում անձի կողմից կատարված անօրինական գործողությունը կամ անգործությունը, որն ուղղված է Հայաստանի Հանրապետության մաքսային օրենսդրությամբ և մաքսային ոլորտին առնչվող Հայաստանի Հանրապետության միջազգային պայմանագրերով Հայաստանի Հանրապետության մաքսային սահմանով տեղափոխվող ապրանքների և տրանսպորտային միջոցների մաքսային հսկողության և մաքսային ձևակերպման սահմանված կարգի դեմ, և որի համար սույն օրենսգրքով նախատեսված է պատասխանատվություն: Ֆիզիկական և պաշտոնատար անձինք մաքսային կանոնները դիտավորյալ կամ անզգուշորեն խախտելու համար ենթակա են պատասխանատվության:

ՀՀ մաքսային օրենսգրքի 203-րդ հոդվածի 1-ին մասի 1-ին պարբերության համաձայն՝ Հայաստանի Հանրապետության մաքսային սահմանով տեղափոխվող ապրանքները և տրանսպորտային միջոցները չհայտարարագրելը կամ ոչ իրենց անվանմամբ հայտարարագրելը կամ հայտարարագրման ժամանակ ոչ ճշգրիտ տեղեկություններ նշելը, որի արդյունքում չի առաջանում մաքսային վճարների (բացառությամբ մաքսավճարի) պակաս հաշվարկում կամ չհաշվարկում, ինչպես նաև ոչ սակագնային կարգավորման միջոցների չկիրառում՝

հանցագործության հատկանիշների բացակայության դեպքում՝ առաջացնում է տուգանքի նշանակում՝ 50 հազար դրամի չափով:

ՀՀ մաքսային օրենսգրքի 219-րդ հոդվածի համաձայն՝ մաքսային կանոնների խախտման վերաբերյալ գործը քննվում է վարչական պատասխանատվության ենթարկվող անձի մասնակցությամբ: Գործը կարող է քննվել նաև տվյալ անձի բացակայության դեպքում, եթե քննության տեղի ու ժամանակի մասին սահմանված կարգով նրան տեղյակ է պահվել, սակայն վերջինիս կողմից որևէ միջնորդություն չի հարուցվել, կամ եթե անձը բացակայում է, և հայտնի չէ նրա գտնվելու վայրը, կամ եթե նա գտնվում է Հայաստանի Հանրապետության սահմաններից դուրս:

Կարեն Յուրիի Գալստյանը 2021 թվականի հունիսի 21-ին հրավիրվել է ՀՀ ՊԵԿ իրավաբանական վարչություն՝ իր նկատմամբ ՀՀ մաքսային օրենսգրքի 203-րդ հոդվածի հատկանիշներով սկսված վարչական գործի քննությանը մասնակցելու համար, սակայն վերջինս չի ներկայացել:

Այսպիսով, նյութերով պարզվել է, որ «Արվա գրուպ» ՍՊ ընկերության անվամբ փաստացի ՀՀ տեղափոխված 983 կգ քաշով հագուստը չի ներառվել Բագրատաշենի մաքսային կետ-բաժնում 06.05.2021 թվականին լրացված թիվ 05100033/060521/0013574 տարանցման հայտարարագրում, ինչպես նաև առկա է փաստացի 2063 կգ քաշով որսորդական երկարաճիտ կոշիկ, այսինքն՝ վարորդ Կարեն Յուրիի Գալստյանը թույլ է տվել ՀՀ մաքսային օրենսգրքի 203-րդ հոդվածի 1-ին մասի 1-ին պարբերությամբ նախատեսված մաքսային կանոնների խախտում, ինչը հիմնավորվում է 13.05.2021թ. մաքսային կանոնների խախտման վերաբերյալ կազմված արձանագրությամբ, 06.05.2021 թվականի թիվ 05100033/060521/0013574 տարանցման հայտարարագրով, 13"05"2021 թվականին լրացված թիվ 256 մաքսային զննման (տեսազննման) ակտով և «Արվա գրուպ» ՍՊ ընկերության տնօրենի պարզաբանմամբ:

Վերոգրյալի հիման վրա և ղեկավարվելով ՀՀ մաքսային օրենսգրքի 203-րդ հոդվածի 1-ին մասի 1-ին պարբերությամբ, 206 և 221-րդ հոդվածներով,

Ո Ր Ո Շ Ե Ց Ի՝

1. Կարեն Յուրիի Գալստյանին (անձնագրի համար՝ AU0403012) ճանաչել զանցառու ՀՀ մաքսային օրենսգրքի 203-րդ հոդվածի 1-ին մասի 1-ին պարբերությամբ և նրան տուգանել 50.000 դրամ: /վճարումը 900005024055 հաշվեհամարին/

3. Որոշման մասին հայտնել Կ. Գալստյանին՝ պարզաբանելով, ՀՀ մաքսային օրենսգրքի 221-րդ հոդվածի 2-րդ մասի համաձայն՝ որոշումն ուժի մեջ է մտնում կայացման պահից: ՀՀ մաքսային օրենսգրքի 222-րդ հոդվածի համաձայն՝ որոշումը կարող է բողոքարկվել վերադաս մաքսային մարմին՝ դա կայացնելուց հետո 10 օրվա ընթացքում կամ ՀՀ վարչական դատարան երկու ամսվա ընթացքում:

ԻՐԱՎԱԲԱՆԱԿԱՆ
ՎԱՐՉՈՒԹՅԱՆ ՊԵՏ



ԱՐՄԱՆ ՄՆԱՑԱԿԱՆՅԱՆ